

武強縣志重修卷十一

藝文志上

邑自齊唐以來人文蔚起第世代遞嬗典籍淪亡欲求前哲之篇章殆如吉光片羽幾不可得

余纂斯志按羅前編始得唐睿宗勅劉幽求一詔而先賢著作之所得見者僅唐孫逖爲宰相賀檀州界破奚寇表此外無聞焉其他若孫刺史蘇大理兩孫司直孫僕射孫觀察各傳則舊志自諸史採入而最足繫人心者唯明辛繼烈

題留武強疏實爲一邑之砥柱餘如宦於斯產
於斯者之文詞苟有關於其地與其事者除已
登於名宦文學孝友義行流寓各類不復重錄
外悉行載入更以元明暨今作者符於體裁之
詞附之以見採擇之弗敢濫也志藝文

詔勅

唐睿宗詔增封侍中武強劉幽求邑戶

頃王室不造中宗厭代戚孽專亂將隕社稷朕與
王公皆幾於難幽求處危思奮翊贊聖儲協和義

士震殄元惡國家之復存繫幽求是賴厥庸茂焉
朕用嘉之雖胙以土宇而賦入未廣昔西漢行封
更擇多戶東京定賞復增大邑宜加賜實封二百
戶子子孫孫傳國無絕特免十死銘諸鐵券以傳
其功

表

爲宰相賀檀州界破奚賊表

唐孫逖

臣等今月二十五日於易州所奏事陛下顧謂臣
曰朝夕之間諸軍當有捷書至臣等愚淺莫測天

心不逾數日張守珪果奏副將安祿山於檀州界
破奚賊擒生斬級并獲馬計至數千定期不差於
晷刻指事有同於符契聖惟廣運神以知來微妙
之言自成於繫象元通之術不假於蓍龜精義難
名前古未有臣等何幸親覩明徵驚喜之誠忭躍
交集伏望宣示朝列兼付史館式昭德音永用垂
範無任喜慶之至謹奉表陳賀以聞

疏

題留武強疏

明

辛繼烈

鴻臚寺序班臣辛繼烈謹題爲城守已固民困宜
恤乞恩炤舊責成以安輿心以存子遺事臣鄉直
隸真定府武強縣城池雖爲湫隘士庶頗知忠義
止務朴實不事紛華如拾壹年口口南下臣鄉西
破深州南破武邑東破獻縣各相隔肆伍拾里惟
武強一邑獲安去年一聞口口紳衿依然同志億
兆不改忠勇除額數兵外新設兵千伍百名製藥
貳萬斤不動分文於帑庫盡皆闔縣之樂輸及閏
拾壹月拾捌日口口北破河間突至臣鄉縣臣鄭

君錫親率士卒砲擊遠遁衆志成城不關地利明
矣及南犯衡水止離臣鄉伍拾里又被攻破臣等
家資盡捐枯盡心血無非爲朝廷之封疆前道臣
檄下武強將臣縣歸併晉州壯士激烈父老流涕
皆欲捐軀守城紳衿各具干結已申道臣在案近
有臣僕來京臣鄉於正月初四日見邸報又有科
臣一本武強歸併之議滿邑驚惶籲天無門竊念
武強城雖小而易守民雖寡而實和口口南犯萬
無一失皆賴我皇上如天之福所垂庇也臣等闔

邑室廬在焉坐墓在焉誰忍舍之輕擲其鄉卽經糧輸課動經壹百伍拾里之遙地隔多盜之深州保定之東鹿士庶能無翼而飛耶去官則一縣無主廢城則四境無依武強卽云彈丸見今保全無恙縣臣鄭君錫年方叁拾中丙子科家係武弁防禦有方倘無故輕爲棄擲以萬死堅據之封疆作一朝邱墟之境界恐無以慰闔縣子民之望嗣後萬有一虞晉州其能以鞭長遂及馬腹乎故必仍從舊制鼓勵闔邑誓死堅守庶殉國之氣百折不

迴諒亦仁人所心惻者也臣效職伍載惟知兢兢
朝儀未敢輕奏一疏歸併實切於已不得不哀鳴
於君父之前也伏祈勅下仍縣制之舊庶一邑獲
安而子遺可保矣崇禎十六年正月 日具題奉
旨該部查議 部議查看得武強縣小民稀守具
未備科臣巡察該縣慮其難守議請歸併以爲權
宜保全之計今序班辛繼烈奏稱闔邑士民不樂
歸併皆願仍從舊制捐軀誓守如鄉民果能激烈
効義衆志成城合無俯順輿情免其歸併仍乞嚴

飭該縣紳衿士民協力捍禦共保危城倘祇避目前遷徙之勞而貽後日無窮之悔則在地方官及辛繼烈從長籌度臣部不任其咎也奉旨依議

傳

孫蕙蔚傳

後魏史

孫蕙蔚字叔炳武邑武遂人也小字陁羅自言六世祖道恭爲晉長秋卿自道恭至蕙蔚世以儒學相傳蕙蔚年十五粗通詩書及孝經論語十八師董道季講易十九師程立讀禮經及春秋三傳周

流儒肆有名於冀方太和初郡舉孝廉對策於中書省時中書監高閭宿聞蕙蔚稱其英辯因相談薦爲中書博士轉皇宗博士閭被敕理定雅樂蕙蔚參其事及樂成閭上疏請集朝貴於太樂共研是非秘書令李彪自以才辯立難於其間閭命蕙蔚與彪抗論彪不能屈黃門侍郎張彞常與遊處每表疏論事多參訪焉十七年高祖南征上議告類之禮及太師馮熙薨蕙蔚監其喪禮上書令熙未冠之子皆服成人之服蕙蔚與李彪以儒學相

知及彪位至尙書蕙蔚仍太廟令高祖曾從容言
曰道固旣登龍門而孫蔚猶沈涓澮朕常以爲負
矣雖久滯小官深體通塞無孜孜之望儒者以是
尙焉二十二年侍讀東宮先是七廟以平文爲太
祖高祖議定祖宗以道武爲太祖祖宗雖定然昭
穆未改及高祖崩祔神主於廟時侍中崔光兼太
常卿以太祖旣改昭穆以次而易兼御史中尉黃
門侍郎邢巒以爲大祖雖改昭穆仍不應易乃立
殫草欲按奏光光謂蕙蔚曰此乃禮也而執法欲

見彈劾思獲助於碩學蕙蔚曰此深得禮變尋爲書以與光讚明其事光以蕙蔚書呈宰輔乃召蕙蔚與巒庭議得失尙書令王肅又助巒而巒理終屈彈事遂寢世宗卽位之後仍在左右敷訓經典自冗從僕射遷秘書丞武邑郡中正蕙蔚旣入東觀見典籍未周乃上疏曰臣聞聖皇之御世也必幽贊人經參天貳地憲章典故述遵鴻猷故易曰觀乎天文以察時變觀乎人文以化成天下然則六經百氏圖書祕籍乃承天之正術治人之貞範

是以溫柔疏遠詩書之教恭儉易良禮樂之道爰
彖以精微爲神春秋以屬辭爲化故大訓炳於東
序藝文光於麟閣斯實太平之樞宗勝殘之要道
有國之靈基帝王之盛業安上靖民敦風美俗其
在茲乎及秦棄學術禮經泯絕漢興求訪典文載
舉先王遺訓燦然復存暨光武撥亂日不暇給而
入洛之書二千餘兩魏晉之世尤重典墳收亡集
逸九流咸備觀其鳩閱史篇訪購經論紙竹所載
畧盡無遺臣學闕通儒思不及遠徒循章句片義

無立而慈造曲覃厠班祕省忝官承乏惟書是司而觀閣舊典先無定目新故雜糅首尾不全有者累帙數十無者曠年不寫或篇第褫落始末淪殘或文壞字誤謬爛相屬篇目雖多全定者少臣請依前丞臣盧昶所撰甲乙新錄欲裨殘補闕損併有無校練句讀以爲定本次第均寫永爲常式其省先無本者廣加推尋搜求令足然經記浩博諸子紛綸部帙旣多章篇紕繆當非三校書歲月可了令求令四門博士及在京儒生四十人在祕書

省專精校考參定字義如蒙聽許則典文允正羣
書大集詔許之又兼黃門侍郎遷中散大夫仍兼
黃門久之正黃門侍郎代崔光爲著作郎才非文
史無所撰著唯自披其傳注數行而已遷國子祭
酒祕書監仍知史事延昌二年追賞侍講之勞封
棗彊縣開國男食邑二百戶肅宗初出爲平東將
軍濟州刺史還京除光祿大夫魏初已來儒生寒
官惠蔚最爲顯達先單名蔚正始中侍講禁內夜
論佛經有愜帝旨詔使加惠號惠蔚法師焉神龜

元年卒於官時年六十七賜帛五百匹贈大將軍
瀛州刺史諡曰戴子伯禮襲封

伯禮善隸書拜奉朝請員外散騎侍郎寧朔將軍
步兵校尉國子博士卒贈輔國將軍巴州刺史子
產同襲少有才學早亡時人惜之

蘇瓊傳

北齊史

蘇瓊字珍之武彊人也父備仕魏至衛尉少卿瓊
幼時隨父在邊嘗謁東荊州刺史曹芝芝戲問曰
卿欲官否對曰設官求人非人求官芝異其對署